

**Votaziun dal pievel dals
11 da mars 2012
Explicaziuns dal Cussegl federal**

- 1 Iniziativa dal pievel
«Per metter ina fin a la construcziun excessiva d'abitazioni secundaras!»**
- 2 «Iniziativa per il respargn immobigliar»**
- 3 Iniziativa dal pievel
«6 emnas vacanzas per tuts»**
- 4 Conclus federal davart la reglamentaziun dals gieus per daners a favur da l'utilitad publica**
- 5 Lescha federala davart ils pretschs fixs per cudeschs**



Schweizerische Eidgenossenschaft
Confédération suisse
Confederazione Svizzera
Confederaziun svizra

Davart quai vegni votà

Iniziativa dal pievel «Per metter ina fin a la construcziun excessiva d'abitaziuns secundaras!»

Emprim
project

L'iniziativa dal pievel vul limitar la quota d'abitaziuns secundaras en Svizra a maximalmain 20 per tschient per visch-nanca. Il Cussegl federal ed il parlament refusan l'iniziativa, perquai ch'ins ha introduì restricziuns effizientas gia cun la revisiun da la Lescha davart la planisaziun dal territori.

Infurmaziuns davart quest project

paginas 4–13

Text da votaziun

paginas 9–10

Iniziativa dal pievel «Iniziativa per il respargn immobigliar»

Segund
project

L'iniziativa dal pievel vul promover levgiamenti fiscals sin respargns per l'emprima cumpra da proprietad d'abitar per l'agen diever. Ultra da quai duain vegnir liberads da la taglia er respargns per mesiras da construcziun che servan a spargnar energia ed a proteger l'ambient.

Infurmaziuns davart quest project

paginas 14–23

Text da votaziun

paginas 19–20

Iniziativa dal pievel «6 emnas vacanzas per tuts»

Terz
project

L'iniziativa dal pievel vul che tut las persunas emploiadadas survegnian il dretg d'almain 6 emnas vacanzas pajadas per onn. Il Cussegl federal ed il parlament recumondan da refusar l'iniziativa.

Infurmaziuns davart quest project

paginas 24–31

Text da votaziun

pagina 28

Conclus federal davart la reglementaziun dals gieus per daners a favur da l'utilitad publica

Quart
project

Sco cuntraproposta a l'iniziativa dal pievel «Per gieus per daners a favur dal bainstar public» proponan il Cussegl federal ed il parlament ina midada da la Constituziun federala. Suenter che l'iniziativa dal pievel è vegnida retratga, vot-schan il pievel ed ils chantuns davart questa cuntraproposta.

Infurmaziuns davart quest project

paginas 32–39

Text da votaziun

paginas 36–37

Lescha federala davart ils pretschs fixs per cudeschs

Tschintgavel
project

Cun ina lescha ha il parlament decidi d'introducir en tut la Svizra pretschs fixs per cudeschs. Uschia vegnan las libra-rias ed ils grossists obligads da vender ils cudeschs per in pretsch fixà. Cunter questa lescha èsi vegnì fatg in refe-rendum.

Infurmaziuns davart quest project

paginas 40–48

Text da votaziun

paginas 50–53

Iniziativa dal pievel

**«Per metter ina fin a la construcziun excessiva
d'abitaziuns secundaras!»**

La dumonda da votaziun è la suandanta:

Vulais Vus acceptar l'iniziativa dal pievel **«Per metter ina fin a la construcziun excessiva d'abitaziuns secundaras!»?**

**Il Cussegl federal ed il parlament recumondan da refusar
l'iniziativa.**

Il Cussegl naziunal ha refusà l'iniziativa cun 123 cunter 61 vuschs e cun 3 abstensiuns, il Cussegl dals chantuns cun 29 cunter 10 vuschs e cun 3 abstensiuns.

Il pli important en furma concisa

Savens possedan famiglias abitaziuns secundaras per far vacanzas. En las regiuns turisticas da la Svizra augmentan quellas la purschida da letgs. Er persunas che han lur plazza da lavur en las citads u en las aglomeraziuns stattan savens en abitaziuns secundaras durant l'emna. Ma las abitaziuns secundaras dovran surfatschas supplementaras ed ellas promovan la construcziun sparpagliada e dischordinada. Ultra da quai chatschan las abitaziuns secundaras ensi ils pretschs d'immobiglias, uschia ch'i po esser pli difficil per persunas indigenas da chattar in'abitaziun pajabla. Il basegn d'agir è renconuschi da bleras varts: Il terren duai vegnir duvrà en moda economica e la cuntrada duai vegnir protegida.

Situaziun
da partenza

L'iniziativa vul limitar la quota d'abitaziuns secundaras a 20 pertschient per vischnanca. Uschia vul ella metter ina fin a la construcziun sparpagliada e dischordinada. Las vischnancas duain vegnir obligadas d'infurmars mintg'onn, sche questa limitaziun vegn observada. Plinavant duain ellas publitgar ina survista da las abitaziuns che vegnan duvradas permanentamain.

Tge vul l'iniziativa?

Il Cussegli federal ed il parlament refusan l'iniziativa, perquai ch'ella na tegna betg quint da las differentas relaziuns regiunalas e localas en Svizra. Per cumbatter ils excess en la construcziun d'abitaziuns secundaras prefereschan il Cussegli federal ed il parlament la revisiun da la Lescha davart la planisaziun dal territori. Questa revisiun è vegnida statuida oriundamain sco cuntraproposta a l'iniziativa. Ella è en vigur dapi il 1. da fanadur 2011 ed oblige scha ils chantuns e las vischnancas da limitar la construcziun d'abitaziuns secundaras cun mesiras clerias.

Opiniun dal
Cussegli federal
e dal parlament

Il project da votaziun en detagi

En Svizra datti oz circa 500 000 abitaziuns secundaras¹. Quai correspunda a var 12 percentschient da tut las abitaziuns. Bleras abitaziuns secundaras datti en las regiuns turisticas classicas dals chantuns Grischun, Vallais, Tessin, Berna e Vad. La du-monda d'abitaziuns secundaras è gronda, ma ellas vegnan duvradas mo darar durant l'onn. Perquai discurran ins er da «letgs fraids». La construcziun d'abitaziuns secundaras contribuescha ultra da quai a la construcziun sparpagliada e dischordinada. Il grond interess chaschuna er in augment dals pretschs da terren e d'immobiglias, uschia che la populaaziun indigena po avair difficultads da chattar abitaziuns pajablas.

Situaziun
da partenza

L'iniziativa dal pievel propona in nov artitgel constituzional che limitescha la quota d'abitaziuns secundaras per vischnanca a maximalmain 20 percentschient da tut las abitaziuns en vischnanca. Nua che questa limita è cuntanschida gia oz, na fissi betg permess da construir novas abitaziuns secundaras. Las abitaziuns secundaras existentes dastgassan dentant restar. Da la restricziun fiss pertutgà oz circa in tschintgavel da tut las vischnancas svizras.

Limitar il dumber
d'abitaziuns
secundaras

L'iniziativa dal pievel vul er obligar las vischnancas d'infurmarr davart l'applicaziun da l'artitgel constituzional e da publitgar in plan che mussa, tge abitaziuns che vegnan duvradas permanentamain (l'uschenumnà «plan da la quota d'emprimas abitaziuns»). L'iniziativa chaschunass uschia custs administratifs supplementars per las autoritads.

Obligaziun
d'infurmaziun da las
vischnancas

¹ Basa da calculaziun: Dumbraziun dal pievel 2000 e statistica dals edifizis e da las abitaziuns 2010 (UST)

Er il Cussegl federal ed il parlament èn da l'avis ch'i saja necessari d'agir en connex cun las abitaziuns secundaras. Perquai han els rinforzà la Lescha davart la planisaziun dal territori. Las adattaziuns èn entradas en vigur il 1. da fanadur 2011. Oriundamain aveva il parlament deliberà la revisiun sco cuntraproposta indirecta a l'iniziativa.

La lescha è già
vegnida rinforzada

Per garantir en tut las regiuns ina proporziun equilibrada tranter emprimas abitaziuns ed abitaziuns secundaras èn ils chantuns e las vischnancas obligads d'adattar fin il 1. da fanadur 2014 lur plans directivs e lur plans d'utilisaziun cun mesiras per limitar la construcziun d'abitaziuns secundaras. Las prescripcziuns èn severas: Tgi che n'ademplescha betg las cundiziuns entaifer quest termin, na dastga betg pli permetter abitaziuns secundaras. La lescha revedida prescriva als chantuns da limitar il dumber da novas abitaziuns secundaras, da promover tant emprimas abitaziuns favuraivlas sco er l'hotellaria e d'occupar meglier las abitaziuns secundaras existentes.

Ils chantuns
ston agir

La realisaziun po vegnir adattada a la situaziun locala. Tscher-tas vischnancas limiteschan il dumber d'abitaziuns secundaras supplementaras, autras determineschan zonas ch'en destinadas a la construcziun d'emprimas abitaziuns per la populaziun indigena, puspè autras procuran ch'ils letgs en abitaziuns secundaras veggian administrads en maniera commerziala ed occupads meglier. Differentas vischnancas defineschan er uschenumnadas zonas per hotels. Uschia impedeschan ellas ch'ils hotels veggan transfurmads en abita-

Instruments
per limitar las
abitaziuns
secundaras

ziuns secundaras. La revisiun da la lescha garantescha che las relaziuns regiunalas e localas pon vegnir resguardadas adequatamain.

L'iniziativa na cuntegna naginas disposiziuns che permettan da meglierar l'occupaziun da las abitaziuns secundaras existentas u d'impedir che hotels vegnian transfurmads en abitaziuns secundaras. L'iniziativa vul unicamain limitar la quota d'abitaziuns secundaras a 20 percentschent da tut las abitaziuns.

Ina iniziativa
cun largias



Text da votaziun

Conclus federal davart l'iniziativa dal pievel

«Per metter ina fin a la construcziun excessiva d'abitaziuns secundaras!»

dals 17 da zercladur 2011

L'Assamblea federala da la Confederaziun svizra,

sa basond sin l'artitgel 139 alinea 5 da la Constituziun federala¹,
suenter avair examinâ l'iniziativa dal pievel

«Per metter ina fin a la construcziun excessiva d'abitaziuns secundaras!»

ch'è vegnida inoltrada ils 18 da december 2007²,
suenter avair gi invista da la missiva dal Cussegl federal dals 29 d'october 2008³,
concluða:

Art. 1

¹ L'iniziativa dal pievel dals 18 da december 2007 «Per metter ina fin a la construcziun excessiva d'abitaziuns secundaras!» è valaivla e vegn puttamesa a la votaziun dal pievel e dals chantuns.

² L'iniziativa ha il suandard text:

I

La Constituziun federala vegn midada sco suonda:

Art. 75b⁴ (nov) Abitaziuns secundaras

¹ La quota d'abitaziuns secundaras è limitada a maximalmain 20 pertschient da l'effectiv total d'unitads d'abitar e da la surfatscha d'auzada brutta che vegn utilisada per intents d'abitar en ina vischnanca.

² La lescha oblighescha las vischnancas da publitgar mintga onn lur plan da quotas d'emprimas abitaziuns ed il stadi detaglià da sia execuziun.

II

Las disposiziuns transitoricas da la Constituziun federala vegnan midadas sco suonda:

¹ CS 101

² Fegi uffizial federal 2008 1113 (versiun tudestga)

³ Fegi uffizial federal 2008 8757 (versiun tudestga)

⁴ L'iniziativa dal pievel pretendeva d'introducir questa disposiziun sco artitgel 75a en la Constituziun federala. Perquai che l'artitgel 75a (Mesiraziun) è entrâ en vigor en il fratemps il 1. da schaner 2008, survegn la disposiziun davart las abitaziuns secundaras, che vegn proponida en l'iniziativa dal pievel, il numer d'artitgel 75b.



Art. 197 cifra 8⁵ (nov)

8. Disposiziun transitorica tar l'art. 75b⁶ (Abitaziuns secundaras)

- 1 Sche la legislaziun correspondenta n'entra betg en vigur entaifer dus onns suenter che l'artitgel 75b è vegni acceptà, relascha il Cussegli federal in'ordinaziun cun las disposiziuns executivas necessarias davart la construcziun, davart la vendita e davart l'inscripzion en il register funsil.
- 2 Permissiuns da construcziun per abitaziuns secundaras, che vegnan concedidas tranter il 1. da schaner da l'onn che suonda l'acceptaziun da l'artitgel 75b e la data che las disposiziuns executivas entran en vigur, èn nunvalaivlas.

Art. 2

L'Assamblea federala recumonda al pievel ed als chantuns da refusar questa iniziativa.

⁵ La numeraziun da la cifra da questa disposiziun transitorica tar l'artitgel respectiv vegn fixada suenter la votaziun dal pievel.

⁶ L'iniziativa dal pievel pretendeva d'introducir questa disposiziun sco artitgel 75a en la Constituziun federala. Perquai che l'artitgel 75a (Mesiraziun) è entrà en vigur en il fratemps il 1. da schaner 2008, survegn la disposiziun davart las abitaziuns secundaras, che vegn proponida en l'iniziativa dal pievel, il numer d'artitgel 75b.

Ils arguments dal comité d'iniziativa

Mettain ina fin a la vendita totala da nossas regiuns da muntogna

Mintg'onn vegnan construidas passa 8000 novas abitaziuns da segunda proprietad en Svizra. Da quellas vegnan construidas 5000 en las regiuns turisticas. En las Alps svizras datti gia ussa dapli che **500 000 abitaziuns secundaras**. Quests edifizis e tut las vias necessarias èn ina sfarlattada da la cuntrada. Parts adina pli vastas da nossas muntognas daventan citads, cuntradas unicas vegnan ruinadas, la natira vegn destruida per adina.

Las abitaziuns secundaras devasteschan las cuntradas alpinas

Projects da surfabricaziun e d'aglomeraziun da dimensiuns schoccantas (sco Andermatt, Aminona, Grimentz etc. etc.) survegnan permissiuns excepiunalas. Igl è daventà normal da crear adina dapli novas zonas da construcziun, da transfurmar zonas protegidas en zonas da construcziun e da conceder permissiuns spezialas. La consequenza logica da questa pratica è che nossas cuntradas las pli bellas e custaivlas vegnan devastadas hectara per hectara.

Las abitaziuns secundaras stgatschan las famiglias indigenas

La construcziun excessiva dad abitaziuns secundaras ha effects catastrofals. Pervia da construcziuns sparpagliadas nuncontrolladas vegnan nossas valladas e spundas betunadas si cun chasas vidas. Ils maletgs dals vitgs vegnan sfigurads ed en nossas Alps datti adina dapli lieus nunabitads cun barcuns serrads. Causa ils tschains ed ils pretschs nunpajabels vegnan las famiglias ed ils fittadins indigenstgatschads or da lur vischnancas. Il turissem vegn donnegià irrevocablamain.

Enfin oz han tant la Confederaziun sco er ils chantuns e las vischnancas tralaschà da stgaffir mesiras per franar quest svilup. Er la nova Lescha davart la planisaziun dal territori n'è betg buna da metter in term a questa politica da destrucziun e da stgatschada. Ella na porscha betg las mesiras effizientas necessarias.

In GEA a l'iniziativa cunter las abitaziuns secundaras porta ina soluziun adequata per in problem urgent.

Nossa iniziativa pretenda ina **quota maximala** unitara per la construcziun d'abitaziuns secundaras en Svizra e fixescha quella a **20 pertschient**. Quai è ina soluziun clera ed adequata per in problem urgent che pertutga nus tuts.

I na sa tracta betg mo da proteger las cuntradas svizras, i va per il futur da nossa patria, per il futur da noss uffants e da lur biadis e per lur ierta che stat en nossa responsabludad.

Ulteriuras infurmaziuns chattais Vus en tudestg sin:
www.zweitwohnungsinitiative.ch

Ils arguments dal Cussegl federal

Er il Cussegl federal è da l'avis ch'i dovria prescripziuns severas areguard la construcziun d'abitaziuns secundaras. L'iniziativa na tegna dentant betg quint da las differentas relaziuns en Svizra. Il Cussegl federal è persvadì ch'ils excess en la construcziun d'abitaziuns secundaras pon vegnir cumbattids meglier tras la Lescha davart la planisaziun dal territori ch'è vegnida rinforzada dacurt. Cuntrari a l'iniziativa gida la lescha er ad occupar meglier las abitaziuns secundaras existentas.
Il Cussegl federal refusa l'iniziativa cunzunt per ils suandants motivs:

Al Cussegl federal statti zunt a cor che la cuntrada vegnia protegida. El è er conscient ch'igl è anc vegnì fatg memia pauc fin ussa en quest reguard en tscherts territoris. L'iniziativa n'è dentant betg la dretga via per impedir excess en la construcziun d'abitaziuns secundaras.

Proteger
la cuntrada

L'iniziativa è memia pauc flexibla. Sche las abitaziuns secundaras vegnissan limitadas ad ina quota fixa da 20 pertschient da tut las abitaziuns, mettess quai ina fin abrupta a l'activitat da construcziun en numerusas vischnancas. Consequentamain creschiss il squitsch sin quels territoris, nua che la quota è oz anc sut 20 pertschient. Uschia vegniss la cuntrada destructurada pli fitg en territoris ch'èn actualmain anc pauc pertutgads. Plinavant daventassan vischnancas ruralas cun paucas plazzas da lavur anc pli deblas: Ellas pateschan da l'emigraziun da la populaziun ed han perquai in'auta quota d'abitaziuns secundaras. Sche l'iniziativa vegniss acceptada, na dastgassan las abitaziuns bandunadas pervia da l'emigraziun betg pli vegnir renovadas u transfurmadas en queste lieus per far vacanzas.

Ina quota
n'è betg ina
soluziun adattada

La Lescha davart la planisaziun dal territori, ch'è già vegnida rinforzada, permetta soluziuns pli efficazias. Ella n'oblighescha betg mo ils chantuns e las vischnancas da cumbatter sistematicamain ils excess en la construcziun d'abitaziuns secundaras. Cuntrari a l'iniziativa sforza ella er ils chantuns e las vischnancas d'occupar meglier las abitaziuns secundaras existentas.

La lescha ha
cleras finamiras

La soluziun da la Confederaziun è equilibrada e raschunaivla: Ella protegia meglier la cuntrada, senza dentant metter en privel ils interess da las vischnancas e dal turissem. Quai permetta a las regiuns da cuntinuar cun lur svilup economic prosperaivel.

Duvrar economica-
main il terren

Cun sias prescripziuns fixescha la Confederaziun las cundi-
ziuns da basa, ils chantuns e las vischnancas decidan davart
las mesiras al lieu. Cuntrari a l'iniziativa restan las vischnan-
cas ed ils chantuns libers da decider, sch'els vulan limitar la
construcziun d'abitaziuns secundaras a maun da contingents,
da taxas directivas, da zonas per hotels u da zonas d'abitar
per persunas indigenas.

Mantegnair
il federalissem

La soluziun da la Confederaziun fa gia ses effect: Dapi il 1. da fanadur 2011 obligechecha la revisiun da la Lescha davart la planisaziun dal territori ils chantuns e las vischnancas da fixar en lur plans directivs e lur plans d'utilisazion mesiras restrictivas per ils territoris ch'en pertutgads fermamain da la construcziun d'abitaziuns secundaras. Per far quai han els temp fin il pli tard il 1. da fanadur 2014. Suenter questa data dastgan las vischnancas mo permetter abitaziuns secunda-
ras, sch'ellas han prendi las mesiras necessarias. En ils chan-
tuns han gia cumenzà las lavurs vi dals plans directivs. Dif-
ferentas vischnancas èn medemamain londervi da render pli severas lur disposiziuns. Grazia a la soluziun da la Confede-
raziun pon excess en la construcziun d'abitaziuns secundaras pia vegnir cumbattids pli svelt e pli efficaziamain. L'iniziativa na pertass percuter betg il success giavischà. Ella fiss cum-
binada cun memia blers dischavantatgs. En spezial man-
chenta ella da procurar che las abitaziuns secundaras existentas vegnan occupadas meglier.

Las disposiziuns
pli severas
fan gia effect

Per tut quests motivs recumondan il CussegI federal ed il parlament da refusar l'iniziativa «Per metter ina fin a la construcziun excessiva d'abitaziuns secundaras!».

Iniziativa dal pievel

«Per in tractament fiscal privilegià da respargns immobigliars destinads a la cumpra da proprietad d'abitar per l'agen diever ed a la finanziaziun da mesiras da construcziun per spargnar energia e per proteger l'ambient
(iniziativa per il respargn immobigliar)»

La dumonda da votaziun è la suandanta:

Vulais Vus acceptar l'iniziativa dal pievel «Per in tractament fiscal privilegià da respargns immobigliars destinads a la cumpra da proprietad d'abitar per l'agen diever ed a la finanziaziun da mesiras da construcziun per spargnar energia e per proteger l'ambient
(iniziativa per il respargn immobigliar)»?

Il parlament ha desistì da dar ina recumandaziun per la votaziun.

Il pli important en furma concisa

Grazia al respargn immobigliar duain uschè bleras persunas sco pussaivel pudair cumprar in'atgna chasa u in'atgna abitaziun en Svizra. Il chapital da spargn che vegn favorisà fiscal-main dastga dentant vegnir duvrà mo per cumprar per l'em-prima giada proprietad d'abitar ch'è destinada duraivlamax ed exclusivamain a l'agen diever. D'ina autra furma da respargn immobigliar profiteschon proprietaris d'abitaziuns e da chasas che vulessan prender mesiras da construcziun per spargnar energia e per proteger l'ambient.

Tge è il respargn immobigliar?

En connex cun il respargn immobigliar vegni votà davart duas iniziativas: d'ina vart davart l'iniziativa actuala per il respargn immobigliar e da l'autra vart davart l'iniziativa «Access a la proprietad grazia al respargn immobigliar» ch'è vegnida inoltrada pli tard. La votaziun davart la seconda iniziativa ha probablamain lieu ils 17 da zercladur 2012.

Tge vul l'iniziativa?

L'iniziativa per il respargn immobigliar pertutga exclusivamain las taglias chantunalas e communalas. Ils chantuns èn libers da decider, sch'els vulan introducir ina, pliras u naginas da las traissuandantas mesiras:

- Deposits da respargn per cumprar proprietad d'abitar (l'uschenumnà *respargn immobigliar*) pon vegnir deducids durant maximalmain 10 onns da las entradas suttamessas a la taglia fin ad in import da 15 000 francs per onn.
- Deposits da respargn per finanziar mesiras per spargnar energia e per proteger l'ambient (l'uschenumnà *respargn immobigliar ecologic*) pon vegnir deducids durant maximalmain 10 onns da las entradas suttamessas a la taglia fin ad in import da 5000 francs per onn. Er questa mesira sa restrenscha a la proprietad d'abitar per l'agen diever.
- Plinavant pon ils chantuns liberar da las taglias chantunalas e communalas las subvenziuns dal maun public a favur dal respargn immobigliar e dal respargn immobigliar ecologic (las uschenumnadas *premias per respargns immobigliars*).

Il parlament ha desistì da dar ina recumandaziun per la votaziun. Il Cussegl federal refusa l'iniziativa.

Opiniun dal
Cussegl federal
e dal parlament

Il project da votaziun en detagi

La quota da proprietad d'abitar – pia la quota d'abitaziuns ch'ils proprietaris dovran sezs cumpareglià cun tut las abitaziuns abitadas permanentamain – è creschida cleramain ils ultims 10 onns. Entant ch'ella importava tenor la dumbraziun federala dal pievel l'onn 2000 34,6 percentschient, è ella oz tenor stimaziuns da l'Uffizi federal d'abitaziuns tar circa 40 percentschient. Cumpareglià cun ils pajais vischins è la quota da proprietad d'abitar en Svizra anc adina pli bassa. Tranter ils chantuns datti dentant grondas differenzas: Entant che la quota sa chatta sut 20 percentschient en chantuns urbans sco Basilea-Citad e Genevra, è ella sur 50 percentschient en chantuns plitost rurals. Là è ella cumparegliabla cun las relaziuns en Germania, en Frantscha u en Austria.

Proprietad d'abitar
en Svizra

Tgi che vul cumprar in'atgna chasa u in'atgna abitaziun en Svizra, po profitar gia oz da levgiaments fiscals. Uschia pon daners da prevenziun da la 2. pitga e da la pitga 3a vegnir retratgs gia avant la pensiun per ina tariffa da taglia pli favuraivla. Tenor l'Uffizi federal d'abitaziuns èn bunamain 36 milliardas francs vegnids retratgs anticipadaman dapi l'onn 1995 or da la 2. pitga (stadi: fin da l'onn 2010).

Levgiaments
fiscals actuals

L'iniziativa propona ussa ulteriurs instruments per facilitar als locataris da cumprar ina chasa u in'abitaziun. Ella renviescha a las experientschas dal chantun Basilea-Champagna. Quel enconuscha dapi 20 onns in model da respargn immobigliar che conceda levgiaments fiscals. Plinavant vul l'iniziativa promover fiscalmain sanaziuns energeticas d'edifizis existents.

Las pretensiuns
da l'iniziativa
per il respargn
immobigliar

Sco emprima mesira vul l'iniziativa privilegiar fiscalmain ils respargns immobiliars: Persunas che vivan en Svizra e che vulessan cumprar per l'emprima giada proprietad d'abitar ch'è destinada duraivlamain ed exclusivamain a l'agen diever, pon deducir mintg'onn deposits da respargn fin a 15 000 francs da las entradas suttamessas a la taglia, e quai durant

1. Respargn
immobigliar

maximalmain 10 onns. Per conjugals èn quai 30 000 francs per onn. Sch'il chapital spagnà vegn duvrà suenter la scadenza da quest 10 onns sco previs per cumprar in'atgna chasa u in'atgna abitaziun, po el vegnir retratg senza pajar taglia. Tgi ch'impunda dentant il chapital spagnà per auters intents, sto pajar ina taglia posteriura sin quest chapital. Tenor l'iniziativa èn ils chantuns libers da decider, sch'els vulan introducir questa nova mesira u betg.

Sco seconda mesira propona l'iniziativa levgiaments fiscals per il respargn immobigliar ecologic: Persunas che han gia proprietad d'abitar u che vulessan cumprar proximamain proprietad d'abitar, pon deducir per il respargn immobigliar ecologic mintg'onn deposits fin a 5000 francs da las entradas suttamessas a la taglia, e quai durant maximalmain 10 onns. Per conjugals èn quai 10 000 francs per onn. Sch'il chapital spagnà vegn duvrà suenter la scadenza da quest 10 onns sco previs per mesiras per spargnar energia e per proteger l'ambient, po quest chapital vegnir retratg senza pajar taglia. Tgi ch'impunda dentant il chapital spagnà per auters intents, sto pajar ina taglia posteriura sin quest chapital. Er qua lascha l'iniziativa decider ils chantuns, sch'els vulan introducir questa nova mesira u betg.

En tut ils chantuns (cun excepziun da Lucerna) pon investiziuns per spargnar energia e per proteger l'ambient vegnir deducidas gia oz da las entradas suttamessas a la taglia. Plinavant sustegnan la Confederaziun ed ils chantuns talas investiziuns cun subvenziuns directas: Tenor l'Uffizi federal d'ambient stattan a disposizion dapi l'onn 2010 mintg'onn 280 fin 300 milliuns francs per il Program d'edifizis da la Confederaziun e dals chantuns. Plinavant existan ulteriurs programs da promozion chantunals en il sectur da l'energia.

Sco terza mesira duain ils chantuns survegnir la pussaivladad da liberar da la taglia sin las entradas las subvenziuns publicas a favur dal respargn immobigliar e dal respargn immobigliar ecologic.

2. Respargn immobigliar ecologic

3. Premias per respargns immobigliars

La realisaziun da l'iniziativa chaschunass damain entradas fiscales per ils chantuns e per las vischnancias. Igl è dentant diffcil da stimar quest minus d'entradas. I n'è numnadament betg pussaivel da prevair, tge chantuns ch'introducissan las mesiras previsas e tgenins betg. Ultra da quai n'enconuschan ins betg il dumber da pajataglias che faschessan diever da las novas pussaivladads.

Las perditas fiscales n'en betg quantifitgables

Las votantas ed ils votants vegnan probablament a pudair s'exprimer ils 17 da zercladur 2012 ina segunda giada davart il tema «respargn immobigliar». L'iniziativa «Access a la proprietad grazia al respargn immobigliar» sa restrenscha dentant al tractament fiscal privilegià da deposits da respargn per cumprar per l'emprima giada proprietad d'abitar.

Plinavant prevesa ella che la Confederaziun ed ils chantuns ston en mintga cas introducir il respargn immobigliar.

Tge capita,
sche las duas
iniziativas vegnan
acceptadas?

En sia missiva dals 18 da settember 2009¹ ha il Cussegl federal explitgà tge che capitass, sche las duas iniziativas veginssan acceptadas. En quest cas veginss applitgada la regulaziun dal dretg nov empè dal dretg pli vegl. Concretament vul quai dir che l'emprima mesira da l'iniziativa actuala – il respargn immobigliar – restass senza effect e veginss remplazzada da las disposiziuns da l'iniziativa «Access a la proprietad grazia al respargn immobigliar». Applitgables fissan percuter la segunda e la terza mesira da l'iniziativa per il respargn immobigliar, numnadament il respargn immobigliar ecologic e la liberaziun da la taglia sin premias per respargns immobigliars.

¹ Fegl uffizial federal 2009 6975 (versiun tudestga)



Text da votaziun

Iniziativa dal pievel federala «Per in tractament fiscal privilegià da respargns immobigliars destinads a la cumpra da proprietad d'abitar per l'agen diever ed a la finanziazion da mesiras da construcziun per spargnar energia e per proteger l'ambient (iniziativa per il respargn immobigliar)»

I

La Constituziun federala¹ vegn midada sco suonda:

Art. 129a (nov) Imposiziun da respargns immobigliars

¹ Ils chantuns pon liberar da la taglia sin la facultad ils respargns immobigliars e da la taglia sin las entradas ils tschains accumulads sin il chapital da respargns immobigliars per ina durada da spargn da maximalmain 10 onns successivs.

² Ils chantuns pon ultra da quai prevair che respargns immobigliars pon vegnir deducids da las entradas suttamessas a la taglia, fin ad ina summa annuala da 15 000 francs per respargns che servan ad in intent tenor l'alinea 3 litera a, fin ad ina summa annuala da 5 000 francs per respargns che servan ad in intent tenor l'alinea 3 litera b; ina tala deducziun è limitada a maximalmain 10 onns. Conjugals che vegnan taxads ensemens pon far valair questa deducziun mintgin per sasez. Cun in'ordinaziun po l'Assamblea federala adattar ils imports maximals a la chareschia.

³ Ils respargns immobigliars en il senn da quest artitgel ston servir a l'intent da:

- a. cumprar per l'emprima giada e cunter pajament proprietad d'abitar per l'agen diever en in domicil svizzer; u
- b. finanziar mesiras per spargnar energia e per proteger l'ambient vi da proprietad d'abitar per l'agen diever en in domicil svizzer.

⁴ Ils respargns immobigliars pon vegnir accumulads mo mintgamai ina giada, dentant betg il medem mument, per ils intents tenor l'alinea 3 e mo da persunas maiorenna che han lur domicil en Svizra.

⁵ Els ston vegnir deponids sin ina banca che suttastat a la surveglianza da la Confederaziun.

⁶ Ils respargns immobigliars ed ils tschains accumulads na dastgan betg vegnir impegnads.

⁷ Ils chantuns pon prevair ina limita da vegliadetgna per persunas che han il dretg da respargns immobigliars, in apport minimal annual per respargns immobigliars ed ina durada da spargn minimala.

⁸ Ils respargns immobigliars accumulads ed ils tschains bunifitgads vegnan suttamess sco entradas ad ina imposiziun da taglia posteriura tenor las regulaziuns chantunala, sche:

- a. ils respargns immobigliars na vegnan betg impundids per l'intent previs entaifer 2 onns suenter la scadenza da la durada da spargn maximala u a partir dal termin d'ina retratga anticipada; en cas che mo ina part dals

¹ CS 101



respargns immobigliars e dals tschains bunifitgads na vegg betg impundida per l'intent previs entaifer quest termin, vegg mo quella su ttamessa sco entrada ad ina imposizion da taglia posteriura;

- b. la persuna che ha accumulà ils respargns immobigliars mora ed il conjugal survivent u ils descendants na surpiglian betg ils respargns immobigliars e na cunituneschan betg cun quels per la durada restanta;
- c. il diever da la proprietad d'abitar vegg midà a la lunga u la proprietad vegg cedida a terzas personas durant ils emprims 5 onns suenter la cumpra tenor l'alinea 3 litera a, senza ch'il retgav cuntanschì vegnia impundi per cumprar en Svizra ina proprietad d'abitar che vegg duvrada en moda identica.

⁹ Sch'ina persuna va a star en in auter chantun vegg suspendida l'imposizion dals respargns immobigliars. Ils chantuns fixeschan ina regulaziun, tenor la quala la suspensiun fiscala scada ed ils respargns immobigliars vegnan su ttamess a l'imposizion da taglia posteriura tenor l'alinea 8, sche quels na vegnan betg impundids per l'intent previs en l'auter chantun.

¹⁰ Ils chantuns pon prevair regulaziuns da cas da direzza, sche l'imposizion da taglia posteriura dals respargns immobigliars chaschuna grevezzas che n'en betg giustifitgadas objectivamain.

¹¹ Ils chantuns decreteschan regulaziuns per impedir abus en connex cun il tractament fiscal privilegià da respargns immobigliars.

Art. 129b (nov) Imposizion da premias per respargns immobigliars

Ils chantuns pon liberar da la taglia sin las entradas premias per respargns immobigliars che stattan en connex cun respargns immobigliars che vegnan impundids per cumprar per l'emprima giada e cunter pajament proprietad d'abitar per l'agen diever en Svizra u per finanziar mesiras per spagnar energia e per proteger l'ambient vi da proprietad d'abitar per l'agen diever en Svizra. Ils chantuns èn cumpetents per reglar ils detagls.

II

Las disposiziuns transitoricas da la Constituzion federala vegnan midadas sco suonda:

Art. 197 cifra 8 (nov)²

8. Disposiziuns transitoricas tar ils artitgels 129a e 129b

Fin che la legislaziun federala adattada als artitgels 129a e 129b entra en vigur, pon ils chantuns decretar disposiziuns che sa basan directamain sin ils artitgels 129a e 129b.

- 2 Cunquai che l'iniziativa dal pievel na remplazza naginas disposiziuns transitoricas existentes, vegg la numeraziun definitiva da la cifra da quest artitgel integrada suenter la votaziun dal pievel. La numeraziun definitiva sa drizza tenor la cronologia da las midadas acceptadas en las votaziuns dal pievel. La Chanzlia federala vegg a far las adattaziuns correspontendas a chaschun da la publicaziun en la Colleccziun uffiziala da las leschas federalas (CULF).

Ils arguments dal comité d'iniziativa

GEA ad in respargn immobigliar liber da taglias per locatarias e locataris

D'avair in tett sur il chau è ina necessitat da basa da nus umans – il meglier stain nus en in lieu ch'appartegna a nus sezs. E tuttina ha la Svizra en la cumparegliazun globala ina da las procentualas las pli bassas da proprietads d'abitar.

Il respargn immobigliar permetta da comprar atgna proprietad (chasa u abitaziun da proprietad) senza ch'ins stoppia duvrar per quai sia cassa da pensiun e viver suenter il pensiunament cun ina renta reducida!

GEA a respargns immobiliars per intents ecologics e per spargnar energia

Memia bleras proprietads d'abitar d'agen diever sguazzan ozendi energia. Sustengnend la sanaziun energetica da quests edifizis contribuin nus efficaziamain a la protecziun da noss ambient. **Ils respargns immobiliars per intents ecologics e per spargnar energia permettan da sanar duraivlamain las proprietads d'abitar e da duvrar energias alternativas.**

GEA a contribuziuns da promozion entiras

Per diminuir la contaminaziun da l'ambient e per promover energias regenerablas sustegna il stadi tranter auter la sanaziun energetica d'edifizis d'abitar che han defects en quest resguard. **Dentant retira il medem stadi fitg spert puspè ina part considerabla da questas contribuziuns, incassond sin ellas la taglia sin las entradas.** Quai vul dir ch'il stadi dat cun in maun e prenda puspè enavos cun l'auter. L'iniziativa vul metter ina fin a questa situaziun absurda.

GEA ad ina realisazion immediata ed adequata da l'iniziativa

Ils chantuns pon realisar quest respargn immobigliar immediat suenter la votaziun dal pievel, considerond er ils basegns chantunals (sco las mesiras da promozion gia avant maun) e realisond per exemplu er mo ina part da las disposiziuns da l'iniziativa. Preparai perquai gia oz il terren per in respargn immobigliar liber da taglias, per respargns immobiliars ecologics e per l'abolizion d'ina taglia absurda.

Tenor in studi realisà da l'**Institut da retschertga GfS (Claude Longchamp)** sostengnan passa 80% dals abitants svizzers ils respargns immobiliars. Il Cussegl naziunal ha acceptà l'iniziativa per il respargn immobigliar cun ina maioritat da **dus terzs**. Quest onn vegn il pievel svizzer er a votar davart l'iniziativa «Access a la proprietad grazia al respargn immobigliar». Quella pretenda ch'il respargn immobigliar vegnia introduci obligatoricamain sin plau federal e chantunal.

Votai GEA per l'iniziativa dal pievel per il respargn immobigliar!

Ulteriuras infurmaziuns chattais Vus en tudestg sin: www.bausparen.ch

Ils arguments dal Cussegl federal

La Confederaziun ed ils chantuns promovan già oz la cumpra da proprietad d'abitar sco er mesiras per spargnar energia e per proteger l'ambient. L'iniziativa chaschuna privilegis fiscals supplementars. Ella disfavurisescha persunas cun entradas bassas e mesaunas che na pon strusch u insumma betg profitar da questas mesiras. Il Cussegl federal refusa l'iniziativa cunzunt per ils sustants motivs:

Tgi che gudogna pauc n'è betg en cas da far respargns immobigliars per ramassar il chapital ch'i dovra per cumprar in'atgna chasa u in'atgna abitaziun. Retschertgas da l'Uffizi federal da statistica mussan che chasadas cun entradas bruttas annualas da 93 096 francs pon spargnar en media 5688 francs per onn¹. Mo quai na basta però strusch per cumprar in'atgna chasa u in'atgna abitaziun. Dischavantagias èn tut quellas persunas che na pon – per motivs finanzials – insumma betg sa prestar in respargn immobigliar. Ina gronda part da la populaziun resta pia exclusa da quests levgiaments fiscales supplementars. Tgi che gudogna percunter bler, è en cas da cumprar proprietad d'abitar per l'agen diever er senza respargns immobigliars.

Entradas pli autas profiteschan

Il respargn immobigliar ecologic permettess als proprietaris d'abitaziuns e da chasas da far deducziuns fiscales exageradas: D'ina vart pudessan els deducir lur deposits da respargn da las entradas suttamessas a la taglia. Tar la retratga pudesan els deducir anc ina giada il medem chapital da respargns immobigliars, sche queste daners vegnan investids per spargnar energia e per proteger l'ambient.

Facilitaziun fiscale exagerada

¹ Retschertga davart ils preventivs da las chasadas 2006–2008, tabella «Entradas ed expensas da las chasadas tenor classa d'entrada»

Cuntrari a las pretensiuns dal comité d'iniziativa n'èn las subvenziuns per sanaziuns energeticas d'edifizis d'abitar existents betg suttamessas a la taglia. Dals custs totals da talas sanaziuns pon vegnir deducids mo ils custs ch'il proprietari surpiglia sez. I na dat pia nagin motiv per modifitgar il dretg vertent.

Nagin basegn
d'agir

Sche l'iniziativa veggiss acceptada e sche sias pretensiuns veggissan realisadas, stuessan las autoritads chantunalas da taglia impunder dapli lavur da controlla: Ellas stuessan controllar, sche la persuna che fa respargns immobigliars è autorizada da deducir ils respargns immobigliars da las entradas suttamessas a la taglia. Plinavant stuessi vegnir controllà, sch'il chapital da respargns immobigliars vegg er propri duvrà per cumprar proprietad d'abitar per l'agen diever. Anc pli cumplitgads fissan ils scleriments e las controllas en connex cun il respargin immobiliar ecologic. L'iniziativa stat pia en cuntradicziun cun la finamira d'in sistem fiscal pli simpel.

Dapli birocrazia

Il parlament ha desistì da dar ina recumandaziun per la votaziun.

Iniziativa dal pievel «6 emnas vacanzas per tuts»

La dumonda da votaziun è la suandanta:

Vulais Vus acceptar l'iniziativa dal pievel **«6 emnas vacanzas per tuts»?**

Il Cussegl federal ed il parlament recumondan da refusar l'iniziativa.

Il Cussegl naziunal ha refusà l'iniziativa cun 122 cunter 61 vuschs e cun 2 abstensiuns, il Cussegl dals chantuns cun 32 cunter 10 vuschs senza abstensiuns.

Il pli impurtant en furma concisa

Mintga persuna emploiada ha dabun oz en Svizra almain 4 emnas vacanzas per onn. Tgi che n'ha betg anc 20 onns ha il dretg da 5 emnas vacanzas. Quai è il minimum legal. En blers contracts da laver èn però fixadas dapli vacanzas.

Situaziun
da partenza

L'iniziativa pretenda che tut las personas emploiadas survegnian almain 6 emnas vacanzas pajadas per onn. Uschia vuela dar vinavant a las lavurantas ed als lavurants ils progress da productivitat da l'economia svizra. Tenor l'opiniun dal comité d'iniziativa servan dapli vacanzas a la sanadad da las lavurantas e dals lavurants, portan dapli qualitad da viver e gidan a pudair cumbinar meglier la professiun cun la famiglia.

Tge vul
l'iniziativa?

Il Cussegl federal ed il parlament refusan l'iniziativa. La regulaziun da las vacanzas vertenta è sa cumprovada. Ella lascha als partenaris socials la libertad necessaria da fixar co ch'ins po reagir sin in augment da la productivitat – cun salaris pli gronds, cun temps da laver pli curts u cun dapli vacanzas. L'obligazion da dar dapli vacanzas restrenschess questa libertad. Ultra da quai lascha l'iniziativa averta la dumonda, co che las absenzas da vacanzas pli lungas duessan vegnir compensadas: saja quai cun dapli persunal ubain tras ina chargia da laver pli gronda per las lavurantas e per ils lavurants.

Opiniun dal
Cussegl federal
e dal parlament

Il project da votaziun en detagi

L'iniziativa pretenda che tut las persunas emploiaadas survegnian il dretg d'almain 6 emnas vacanzas pajadas per onn. Il minimum da vacanzas valess pia per mintga relaziun da lavur, seja quai en l'economia privata u en il servetsch public, seja quai per salaris mensils, al di, a l'ura ubain tar lavur d'accord.

Dapli vacanzas
per tutz

Las iniziantas ed ils iniziants motiveschan lur pretensiun cun il fatg che dapli vacanzas permettian ina relaziun pli equilibrada tranter la chargia da lavur e la recreaziun. La productivitat – ed uschia er la chargia per las lavurantas e per ils lavurants – seja creschida massivamain ils ultims onns. Cun vacanzas pli lungas stoppian las lavurantas ed ils lavurants ussa survegnir lur part dal progress da la productivitat.

Motivaziun
da l'iniziativa

Actualmain vala il dretg minimal legal da 4 emnas vacanzas per onn; lavurantas e lavurants sut 20 onns han il dretg da 5 emnas. Blers patruns concedan però dapli vacanzas. L'iniziativa vul auzar il minimum da vacanzas a 6 emnas per onn. Patruns pudessan anc adina permetter dapli vacanzas. Da dar damain vacanzas che la durada minimala na fiss perunter betg permess.

Dretg a dapli
vacanzas

Il text da l'iniziativa na di betg co che las absenzas pli lungas da la plaza da lavur stuessian vegnir cumpensadas en cas che l'iniziativa vegniss acceptada. Sch'ins sto engaschar dapli personal, creschan ils custs. Quai faschess donn a la Svizra sco lieu da lavur. Sch'ins quinta cun 240 dis da lavur per onn e cun 5 dis da lavur per emna, correspunda 1 emna supplementara da vacanzas ad in augment dals custs da salari da circa 2 pertschient. Sche las interpresas n'engaschan betg personal supplementar, crescha il squitsch sin las persunas emploiaadas, perquai ch'ellas ston prestar dapli en in temp da lavur pli curt.

Dumondas avertas

Percunter vegniss reglada cleramain la midada dal dretg da vacanzas actual al dretg da vacanzas nov. L'emprim onn chalendar suenter l'acceptazion da l'iniziativa avessan tut las lavurantas e tut ils lavurants il dretg d'almain 5 emnas vacanzas. Ils proxims 5 onns chalendars vegniss il dretg augmentà mintg'onn per 1 di, uschia che las 6 emnas vacanzas pretendidas fissan cuntanschidas la finala suenter 6 onns.

Termin transitoric
da 6 onns



Text da votaziun

Conclus federal davart l'iniziativa dal pievel «6 emnas vacanzas per tuts»

dals 17 da zercladur 2011

L'Assamblea federala da la Confederaziun svizra,

sa basond sin l'artitgel 139 alinea 5 da la Constituziun federala¹, suenter avair examinà l'iniziativa dal pievel «6 emnas vacanzas per tuts» ch'è vegnida inoltrada ils 26 da zercladur 2009², suenter avair gi invista da la missiva dal Cussegl federal dals 18 da zercladur 2010³, *concluda:*

Art. 1

¹ L'iniziativa dal pievel dals 26 da zercladur 2009 «6 emnas vacanzas per tuts» è valiavl e vegn suttamessa a la votaziun dal pievel e dals chantuns.

² L'iniziativa ha il suandard text:

I

La Constituziun federala vegn midada sco suonda:

Art. 110 al. 4 (nov)

⁴ Tut las lavurantas e tut ils lavurants han il dretg d'almain sis emnas vacanzas pajadas per onn.

II

Las disposiziuns transitoricas da la Constituziun federala vegnan midadas sco suonda:

Art. 197 cifra 8⁴ (nov)

8. Disposiziuns transitoricas tar l'art. 110 al. 4

¹ L'onn chalendar che suonda l'onn ch'il pievel ed ils chantuns han acceptà l'artitgel 110 alinea 4 han tut las lavurantas e tut ils lavurants il dretg sin almain tschintg emnas vacanzas. Ils tschintg onns chalendars sustants s'augmenta il dretg per in di ad onn.

² Fin che la nova legislaziun federala è entrada en vigur, regla il Cussegl federal ils detagls necessaris.

Art. 2

L'Assamblea federala recumonda al pievel ed als chantuns da refusar questa iniziativa.

¹ CS 101

² Fegl uffizial federal 2009 5669 (versiun tudestga)

³ Fegl uffizial federal 2010 4671 (versiun tudestga)

⁴ La cifra definitiva da questa disposiziun transitorica tar l'artitgel respectiv vegn fixada suenter la votaziun dal pievel.

Ils arguments dal comité d'iniziativa

La vita professiunala è in maraton e betg in sprint

Las midadas structuralas da l'economia han augmentà il squitsch sin las lavurantas e sin ils lavurants. Passa 80% da las persunas emploiajas pateschan da stress e d'ina chargia da lavour memia gronda. La consequenza da questas cundiziuns da lavour èn numerus problems da sanadad che custan a la populaziun svizra var 10 milliardas francs l'onn.

En conugal internaziunal stat la Svizra a la testa da la rangaziun per il dumber d'uras da lavour emnilas ed a la cua per las vacanzas. Il squitsch crescent al plaz da lavour na permetta ozendi betg da cumbinar equilibradamain la lavour ed il temp liber. I manca il temp per sa remetter, per la famiglia u per engaschaments voluntaris. Il dumber da las persunas ch'èn ablas da lavourar fin a la vegliadetgna da pensiun ordinaria sa diminuescha constantamain.

Quest svilup vegn a s'accentuar damai che la populaziun activa daventa pli e pli veglia. La medischina da lavour ha cumprovà ch'igl è pussaivel da sa remetter cumplettamain mo interrumpend pliras giadas l'onn la lavour per ina perioda pli lunga d'almain duas emnas. Quai permetta da prevegnir a surchargias acumuladas sur onns ed a malsognas cronicas – ina premissa per mantegnair la sanadad da las lavurantas e dals lavurants.

Las sis emnas vacanzas èn meritadas ed economicamain supportablas

Il dabun da sis emnas vacanzas duai vegnir introduci pass per pass durant ina perioda da sis onns. Uschia pon las lavurantas ed ils lavurants prender part adequatamain al grond progress economic dals ultims 20 onns. Per l'economia è l'augment da la summa da las pajas per totalmain 2% supportabel.

Questa iniziativa dal pievel metta ina fin a las grondas discrepanzas actualas areguard il dumber d'emnas da vacanzas en Svizra e dat a tut las lavurantas ed a tut ils lavurants il dretg a la medema quantitat da vacanzas.

L'iniziativa «6 emnas vacanzas per tuts» è ina resposta directa e moderna al grond squitsch che paisa ussa ed en futur sin las lavurantas e sin ils lavurants.

Ulteriuras infurmaziuns chattais Vus en tudestg sin:

www.sechswochenferien.ch

Ils arguments dal Cussegl federal

Mo persunas emploiadadas recreadas e saunas èn ablas da prestar buna lavur. Il Cussegl federal beneventa perquai regulaziuns che garanteschan la recreaziun ed il bainstar. L'iniziativa na dat nagina garanzia a las persunas emploiadadas da vegnir distgargiadas. Cun custs da salari pli auts fa ella però donn a la Svizra sco lieu da lavur. Il Cussegl federal refusa l'iniziativa cunzunt per ils sustants motivs:

Absenzas pli lungas pervia da vacanzas ston vegnir cumpensadas insaco. Ubain che las interpresas engaschan dapli personal ubain che las persunas emploiadadas ston far lur lavur en in temp pli curt. Il text da l'iniziativa na respunda però betg questas dumondas. I resta pia avert, tgi che stuess purtar la chargia supplementara, sche l'iniziativa vegniss accep-tada: ils patruns u las persunas emploiadadas.

Tgi porta la chargia supplementara?

Sch'ins sto engaschar dapli personal, creschan ils custs. Mintga emna da vacanzas augmenta ils custs da salari per circa 2 pertschient. Independentamain da la situaziun econo-mica vegni ad esser grev gist per interpresas pli pitschnas e mesaunas da supportar custs da salari pli auts. Ils custs supplementars fan la finala però donn a tut la Svizra sco lieu da lavur ed indebleschan sia competitivitat.

Chargia per la Svizra sco lieu da lavur...

Sch'ils patruns n'engaschan – per motivs finanzials u per auters motivs – betg personal supplementar per equalisar las absenzas durant las vacanzas pli lungas, na cuntanscha l'in-ziativa betg sia finamira. Perquai che las persunas emploia-das vegnan distgargiadas mo, sche la lavur po vegnir repara-tida sin dapli mauns e chaus. Cas cuntrari crescha la chargia per mintga singula lavuranta e mintga singul lavurant. Uschia pudess er esser vana la speranza da proteger la sana-dad da las lavurantas e dals lavurants cun dapli vacanzas e da spargnar uschia custs da sanedad.

...u per las persunas emploiadadas

La regulaziun actuala da las vacanzas è sa cumprovada. Ella dat a las partidas da contract sco er als partenaris sociaux la pussaivladad da chattar soluziuns sin mesira. En bleras bran-schas èn ins sa cunvegnì per exemplel che 1 u 2 emnas va-canças supplementaras per persunas sur 50 onns èn raschunaivlas ed economicamain supportablas. Talas soluziuns ne-goziadas èn pussaivlas, perquai che la libertad contractuala porscha il spazi d'agir necessari. L'obligaziun da dar dapli vacanzas restrenschess questa libertad. Ils patruns avessan pli gronda fadia da satisfar als basegns da singulas lavurantas e da singuls lavurants, per exemplel cun augmentar il salari, cun reducir il temp da lavur u cun autres megliera-zions da las condizioni da lavur sco plazzas parzialas, flexibi-lisaziun dal temp da lavur u indrizs per la tgira d'uffants.

Er en la cumparegliaziun internaziunalha la Svizra temps da lavur attractivs. Sch'ins contempla ils dretgs da vacanzas legals e las soluziuns actualas cun ils partenaris sociaux, na datti tenor l'avis dal Cussegli federal nagin basegn da cum-pensaziun envers l'exterior.

Per tut quests motivs recumondan il Cussegli federal ed il parlament da refusar l'iniziativa «6 emnas vacanzas per tuts».

Soluziuns actualas
fatgas sin mesira

La Svizra
è internaziunalmain
attractiva

Conclus federal davart la reglementaziun dals gieus per daners a favur da l'utilitad publica

(Cuntraproposta a l'iniziativa «Per gieus per daners a favur dal bainstar public» ch'è vegnida retratga)

La dumonda da votaziun è la suandanta:

Vulais Vus acceptar il conclus federal dals 29 da settember 2011 davart la **reglementaziun dals gieus per daners a favur da l'utilitad publica?** (Cuntraproposta a l'iniziativa «Per gieus per daners a favur dal bainstar public» ch'è vegnida retratga)

Il Cussegl federal ed il parlament recumondan d'acceptar la revisiun da la Constituziun federala.

Il Cussegl naziunal ha refusà l'iniziativa cun 140 cunter 3 vuschs senza abstensiuns, il Cussegl dals chantuns cun 34 cunter 0 vuschs e cun 2 abstensiuns.

Il pli important en furma concisa

Bancas da gieu, lottarias e scumessas da sport: Ils gieus per daners han ina pulita attracziun en Svizra. Grazia a queste gieus per daners survegn il maun public mintg'onn summas considerablas. Ellas èn destinadas ad intents d'utilitad publica sco er a l'assicuranza per vegls, survivents ed invaliditat.

Situaziun
da partenza

L'onn 2009 è vegnida inoltrada l'iniziativa dal pievel «Per gieus per daners a favur dal bainstar public». En il fratemps è ella vegnida retratga a favur d'ina cuntraproposta che la Confederaziun, ils chantuns, il comité d'iniziativa ed ulteriurs acturs han elavurà cuminaivlamain. Perquai ch'i sa tracta d'ina modificazion da la Constituzion federala, ston il pievel ed ils chantuns votar davart quest project a l'urna.

Iniziativa e
cuntraproposta

La cuntraproposta regla l'entir sectur dals gieus per daners: las bancas da gieu e tut ils auters gieus per daners sco lottarias, scumessas da sport e gieus d'inschign. La competenza da la legislaziun davart ils gieus per daners ha la Confederaziun. Per exequir ella en il sectur da las bancas da gieu è vinavant cumpetenta la Confederaziun. Per l'execuziun en il sectur dals ulteriurs gieus per daners garantescha l'artitgel constituzional la cumpetenza als chantuns. La cuntraproposta fixescha ch'ils retgavs nets da lottarias e da scumessas da sport ston vegnir duvrads cumplainamain per intents d'utilitad publica, numnadaman per la cultura, per ils fatgs socials e per il sport. Las entradas che derivan da las taxas sin bancas da gieu van vinavant a l'AVS ed a l'AI. Ultra da quai obliquescha l'artitgel constituzional la Confederaziun e da nov er ils chantuns da tegnair quint dals privels dals gieus per daners. Uschia surpiglia el ils giavischs centrals da l'iniziativa retratga.

Tge porta la
cuntraproposta?

Il Cussegli federal ed il parlament èn da l'avis che la cuntraproposta saja ina bona basa per reglar ils gieus per daners. Els recumondan a las votantas ed als votants d'acceptar il nov artitgel constituzional.

Opiniun dal
Cussegli federal
e dal parlament

Il project da votaziun en detagi

Dapi tschientaners vegni giugà per daners, er en Svizra. Saja quai roulette u blackjack, lotto u euromillions, scumes-sas da ballape u da chavals – la purschida è vasta, er en l'internet. Dals retgavs da las bancas da gieu, da las lottarias e da las scumessas da sport ha il maun public survegnì l'onn 2010 quasi 1 milliarda francs, da quai èn vegnids impundidis 545 milliuns francs per intents d'utilitad publica e circa 390 milliuns francs per l'AVS.

Impurtaza dals
gieus per daners

La cuntraproposta prevesa che la Confederaziun possia reglar cumplettamain tut il sectur dals gieus per daners, quai vul dir las bancas da gieu ed ulteriurs gieus per daners sco lottarias, scumessas da sport e gieus d'inschign. En cas da las bancas da gieu mantegna la cuntraproposta il sistem cumprovà: Per installar e per manar bancas da gieu sto anc adina vegnir dumandada ina concessiun da la Confederaziun. Sco enfin ussa duai quella incassar a favur da l'AVS e da l'AI ina taxa sin bancas da gieu che dependa dal retgav.

Cumpetenzas da la
Confederaziun

Ils chantuns restan vinavant responsabels per permetter e per survegliar ils gieus per daners sco lottarias, scumessas da sport e gieus d'inschign. Questa cumpetenza che vegn ussa fixada en la Constituziun federala correspunda per gronda part a la situaziun actuala. La finala permetta la cuntraproposta ch'ils retgavs nets da las lottarias e da las scumessas da sport vegnian duvrads cumplainamain per intents d'utilitad publica, en spezial en ils secturs da la cultura, dals fatgs socials e dal sport. La cuntraproposta augmenta er la valur da questa regulaziun cun auzar ella dal stgalim da la lescha al stgalim constituziunal.

Cumpetenzas
dals chantuns

Gieus per daners èn colliads cun differents privels: la dependenza dal gieu, ma er l'engion, la criminalitat per sa procurar ils daners per giugar e la lavada da daners suspectus. Il nov artitgel constituziunal obligea la Confederaziun e da nov er ils chantuns da tegnair quint da quests privels e da proteger adequatamain la populaziun. En quest connex ston per exemplu vegnir observadas las caracteristicas dals divers gieus. Questa incumbensa da las autoritads è pia formulada ussa en furma bler pli concreta che en la norma constituzionala actuala.

Protecziun
cunter privels

La cuntraproposta prevesa ultra da quai da stgaffir in organ cuminaivel da la Confederaziun e dals chantuns. Quel duai procurar che la Confederaziun ed ils chantuns sa coordineschian per ademplir lur incumbensas.

Coordinaziun

La cuntraproposta è vegnida elavurada en cooperaziun da la Confederaziun, dals chantuns, dal comité d'iniziativa e d'ulterius acturs. Ella è pia il resultat d'in vast consens. En il parlament n'è ella perquai quasi betg vegnida contestada. Singulas varts han pretendì da dar anc dapli pais a la protecziun cunter la dependenza dal gieu e cunter ils auters privels dals gieus per daners. Quests giavischs pon vegnir resguardads en il rom da la legislaziun executiva.

In vast consens



Text da votaziun

Conclus federal davart la reglamentaziun dals gieus per daners a favur da l'utilitad publica

(Cuntraproposta a l'iniziativa «Per gieus per daners a favur dal bainstar public»)

dals 29 da settember 2011

*L'Assamblea federala da la Confederaziun svizra,
sa basond sin l'artitgel 139 alinea 5 da la Constituziun federala¹,
suenter avair examinà l'iniziativa dal pievel «Per gieus per daners a favur dal
bainstar public» ch'è vegnida inoltrada ils 10 da settember 2009²,
suenter avair gi invista da la missiva dal Cussegl federal dals 20 d'october 2010³,
concluda:*

I

La Constituziun federala vegn midada sco suonda:

Art. 106 Gieus per daners

¹ La Confederaziun decretescha prescripziuns davart ils gieus per daners, tegnend quint dals interess dals chantuns.

² Per installar e per manar bancas da gieu è necessaria ina concessiun da la Confederaziun. Tar la surdada da concessiuns resguarda la Confederaziun las cundiziuns regiunalas. Ella incassescha ina taxa sin bancas da gieu che dependa dal retgav; la taxa na dastga betg surpassar 80 pertschient dal retgav brut da gieu. Questa taxa è destinada a l'assicuranza per vegls, survivents ed invaliditatad.

³ Ils chantuns èn cumpetents per permetter e per survegliar:

- a. ils gieus per daners accessibels ad in dumber illimità da persunas en plirs lieus ed en ils quals i vegn tratg la sort u procedì en moda sumeglianta; exceptads èn ils sistems da jackpot da las bancas da gieu;
- b. las scumessas da sport;
- c. ils gieus d'inschign.

⁴ Ils alineas 2 e 3 vegnan er applitgads per ils gieus per daners purschids a basa da la telecommunicaziun.

⁵ La Confederaziun ed ils chantuns tegnan quint dals privels en connex cun ils gieus per daners. Tras la legislazion e tras mesiras da surveglianza garanteschan els ina protecziun adequata, resguardond en quest connex las differentas caracteristicas dals gieus sco er la furma ed il lieu da la purschida.

¹ CS 101

² Fegl uffizial federal **2009** 7019 (versiun tudestga)

³ Fegl uffizial federal **2010** 7961 (versiun tudestga)

⁶ Ils chantuns garanteschan ch’ils retgavs nets dals gieus tenor l’alinea 3 literas a e b vegnian duvrads dal tuttafatg per intents d’utilitat publica, en spezial en ils secturs da la cultura, dals fatgs socials e dal sport.

⁷ La Confederaziun ed ils chantuns sa coordineschan per ademplir lur incumbensas. Perquai stgaffescha la lescha in organ cuminavel che sa cumpona mintgamai per la mesadad da commembers dals organs executivs da la Confederaziun e dals chantuns.

II

Questa cuntraproposta vegn suttamessa a la votazion dal pievel e dals chantuns. Sche l’iniziativa dal pievel «Per gieus per daners a favur dal bainstar public» na vegn betg retratga, vegn ella suttamessa ensemen cun questa cuntraproposta a la votazion dal pievel e dals chantuns tenor la procedura previsa en l’artitgel 139^b da la Constituziun federala.⁴

⁴ L’iniziativa dal pievel è vegnida retratga. La votazion dal pievel en chaussa n’ha damai betg lieu.

Ils arguments dal Cussegl federal

La cuntraproposta è ina buna basa per ina legislaziun cumplexiva e moderna davart ils gieus per daners. Sin basa dal nov artitgel constituziunal vegn il legislatur a pudair fixar regulaziuns che tegnan quint dals privels dals gieus per daners e che permettan er ina purschida da gieus attractiva.
Il Cussegl federal sostegna il project oravant tut per ils suan-dants motivs:

Squadras giuvenilas da ballape, il Museum svizzer da transports a Lucerna, il chastè da Chillon u canortas d'uffants: Quai èn mo in pèr exemples d'organisaziuns e d'instituziuns che vegnan sustegnidias actualmain cun daners ch'ils chantuns survegnan da lottarias e da scumessas da sport. Il nov artitgel constituziunal garantescha ch'ils retgavs nets da gieus per daners vegnian impundids er en il futur per intents d'utilidad publica. Uschia mantegna el il sostegn actual da numerosas activitads en ils secturs da la cultura, dals fatgs socials e dal sport. Bleras da quellas activitads èn da gronda impurtanza en la societad e pudessan vegnir finanziadas autramain mo cun grondas difficultads. Er las bancas da gieu contribueschan vinavant lur part a la generalitat: Ina gronda part da lur retgavs bruts da gieu è destinada er en il futur a l'assicuranza per vegls, survivents ed invaliditat.

Mantegnair in
sustegn prezius

Ins sto prender serius ils privels dals gieus per daners, surtut la dependenza dal gieu. Il nov artitgel constituziunal fa quai: El ha ina formulaziun pli concreta che la disposiziun vertenta e n'oblighescha betg mo la Confederaziun, mabain da nov er ils chantuns da tegnair quint dals privels che resultan dals gieus per daners, e quai en lur legislaziun ed en la surve-glianza dals gieus. Plinavant ston la Confederaziun ed ils chantuns proteger la populaziun cunter quests privels.

Cunter la
dependenza dal gieu
ed auters privels

Il nov artitgel constituziunal dat a la Confederaziun la cumpe-tenza da reglar cumplettamain il sectur dals gieus per daners – inclusiv ils gieus d'inschign ed ils gieus per daners en l'internet. Per conceder permissiuns e per far la surveglianza n'è la Confederaziun però betg l'unica autoritat responsabla: La Confederaziun permetta e surveglia las bancas da gieu. Percunter permettan e surveglian ils chantuns tut ils gieus per daners offrids ordaifer las bancas da gieu. Per che la Confederaziun ed ils chantuns possian coordinar vicendaivlamain questas incumbensas executivas, dovri in organ communabel sco previs en il nov artitgel constituziunal.

Execuziun
coordinada

Per tut queste motivs recumondan il Cussegl federal ed il parlament d'acceptar il conclus federal davart la reglamentaziun dals gieus per daners a favur da l'utilitad publica.

Lescha federala davart ils pretschs fixs per cudeschs

La dumonda da votaziun è la suandanta:

Vulais Vus acceptar la Lescha federala dals 18 da mars 2011
davart ils **pretschs fixs per cudeschs** (LPCud)?

**Il Cussegl federal ed il parlament recumondan d'acceptar
questa lescha federala.**

Il Cussegl naziunal ha acceptà il project da votaziun cun
96 cunter 86 vuschs e cun 5 abstensiuns, il Cussegl dals
chantuns cun 23 cunter 19 vuschs e cun 1 abstensiun.

Il pli important en furma concisa

La *Svizra tudestga* ha gì fin l'onn 2007 pretschs fixs per cudeschs. Quai vul dir: Las librarias stuevan vender ils cudeschs per in pretsch final fixà. En la *Svizra franzosa* è il pretsch per cudeschs liber dapi il cumentzament dals onns 1990. En la *Svizra taliana* è el adina stà liber.

Fatgs
precedents

Ils pretschs fixs per cudeschs en Svizra tudestga eran fixads en contracts tranter chasas edituras, commerziants intermediers e librarias. L'onn 2007 ha il Tribunal federal declarà che questi pretschs fixs per cudeschs na sajan betg permess. Dapi lura èn ils pretschs libers. L'onn 2004 è vegnida inoltrada ina iniziativa parlamentara per reglar ils pretschs fixs per cudeschs en ina lescha che vala per tut la Svizra. Questa iniziativa è il punct da partenza da la nova lescha.

Situaziun
da partenza

Tenor la nova Lescha federala davart ils pretschs fixs per cudeschs fixeschan las chasas edituras u il commerzi a l'en-grossa ils pretschs che valan per la vendita da cudeschs en Svizra. Ina libraria sto pia vender ils cudeschs per pretschs fixads.

Puncts caracte-
ristics da la nova
lescha

Cunter questa lescha èsi vegnì fatg in referendum. Ils pretschs fixs per cudeschs sajan ina intervenziun sproporzionada en l'economia dal martgà liber. Las consumetas ed ils consumenti stoppian pajar pretschs exagerads.

Motivs per il
referendum

Per il parlament èn ils pretschs fixs per cudeschs ina mesira adattada per sustegnair las auturas ed ils auturs svizzers, las chasas edituras e las librarias en Svizra sco er per proteger il cudesch sco bain cultural. Ultra da quai promovan els la diversitàt culturala. Il Cussegl federal era oriundamain cunter ils pretschs fixs per cudeschs. Ussa surpiglia el la posiziun dal parlament, sco che la Lescha federala davart ils dretgs politics prevesa per in tal cas¹.

Opiniun dal
Cussegl federal
e dal parlament

¹ Lescha federala dals 17 da december 1976 davart ils dretgs politics (art. 10a al. 4, CS 161.1)

Il project da votaziun en detagi

Il cedesch è in bain cultural impurtant che represehenta l'identitat d'in pajais. Cun ils pretschs fixs per cedeschs duain vegnir promovidas la diversitat e la qualitat da quest bain cultural. Uschè bleras lecturas e blers lecturs sco pussaivel duain avair access a cedeschs, e quai a las meglras cundiziuns pussaivlas.

Pertge pretschs fixs per cedeschs?

Ils pretschs fixs valan per cedeschs novs en las linguis naziunalas da la Svizra che vegnan edids u vendids en Svizra. Cedeschs che vegnan edids a l'exterior suttastattan mo a la lescha, sch'els vegnan importads professiunalmain, pia per intents commercials. Ils pretschs fixs per cedeschs valan er per il commerzi online, medemamain per il commerzi sur cunfins. La lescha menziunescha dentant explicitamente l'import professiunal. I na dat nagina basa legala per la controlla dal commerzi online transcunfinal tras las autoritads.

Per tge cedeschs valan ils pretschs fixs?

Las chasas edituras u ils importaders fixeschan ils pretschs da vendita finals per ils cedeschs ch'els han edi u importà. Els publitgeschan ils pretschs da vendita finals avant ch'edir il cedesch u avant eventualas midadas dal pretsch. Il pretsch fix per in cedesch vala per almain 18 mais.

Tgi fixescha ils pretschs?

Las librarias vendan ils cedeschs per pretschs fixads da las chasas edituras u dals importaders. Ellas pon dentant conceder ina reducziun da maximalmain 5 pertschient dals pretschs da vendita finals fixads. Ulteriuras reducziuns pon elllas conceder a bibliotecas publicas e sin cumpras a l'engrossa.

Tgi sto observar ils pretschs fixs per cedeschs?

La branscha sezza sto controllar ch'ils pretschs fixs per cedeschs vegnian observads. Per quest intent metta la lescha a disposiziun a las federaziuns professiunalas ed economicas sco er a las organisaziuns da consumentas e da consuments pussaivladads da purtar plants da dretg civil.

Tgi surveglia la realisaziun?

Il survegliader dals pretschs observa il svilup dals pretschs per cudeschs. Sch'el constatescha pretschs fermamain exagerads en comparegliaziun cun l'exterior, po el proponer al Cussegl federal da fixar la differenza maximala autorisada envers ils pretschs da l'exterior. Quella po variar per cudeschs da lingua tudestga, da lingua franzosa e da lingua taliana.

L'iniziativa per la Lescha davart ils pretschs fixs per cudeschs è vegnida dal parlament. En sia posizun dals 20 da matg 2009² ha il Cussegl federal refusà il sboz da la lescha. El ha valità ils pretschs fixs per cudeschs sco intervenziun en il martgà che n'è betg permessa tenor la Constituziun federala vertenta. Ultra da quai ha el dubità ch'ils pretschs fixs per cudeschs possian cuntanscher las finamiras vulidas, numnadamain da garantir ch'i vegnia purschi in sortiment cumplessiv da cudeschs e che uschè bleras persunas sco pussaivel hajan access a la purschida da cudeschs.

Tgi surveglia
ils pretschs
da vendita finals?

Posiziun oriunda
dal Cussegl federal

² Fegl uffizial federal 2009, p. 4169 ss. (versiun tudestga)

Ils arguments dal comité da referendum

Per cudeschs favuraivels – cunter pretschs da cudeschs fixads dal stadi

Il parlament ha decidì cunter la voluntad dal Cussegl federal dad introducir puspè pretschs fixs per cudeschs. Las chasas edituras vulan definir en atgna reschia ils pretschs dals cudeschs ch'èn già ussa auts. Ils librarists ston surpigliar quests pretschs fixads dad auters. Perder perdan las lecturas ed ils lecturs che ston pajar pretschs exagerads. Perquai cumbattain nus cunter quest nuschaivel dictat da pretschs.

NA a pretschs da cudeschs exagerads: Ils aderents dals pretschs fixs per cudeschs taschentan lur interess economics e pretendan ch'els veglian sulettamain promover il cudesch sco bain cultural. Pretschs fixs memia auts n'en dentant betg in bun instrument per promover la cultura. Il cuntrari: Cudeschs favuraivels èn la meigra promozion da la lectura!

NA a la sblundregiada dals lecturs svizzers: Passa 90% dals cudeschs vegnan importads e passa la mesadad dal martgà da cudeschs svizzer vegn dominada da grondas chasas edituras estras. Quellas s'interessan mo per la capacitat da cumpra en Svizra – e betg per la promozion da la cultura. L'unic che vegn promovì è che las lecturas svizras ed ils lecturs svizzers cumpran lur cudeschs a l'ester.

NA a la spariziun da las librarias pitschnas: La legislaziun davart ils pretschs fixs per cudeschs definescha artifizialmain pretschs memia auts e permetta mo rabats fin a 5%. Librarists svizzers pitschens ed innovativs èn daditg sa disads al martgà liber, e quest corset da pretschs impedescha lur svilup. Perquai n'è la branscha da cudeschs betg unida areguard questa nova lescha.

NA ad ina reglamentaziun absurda da l'internet: Ils pretschs fixs per cudeschs valan er per il commerzi online. Quai è absurd. La duana svizra na dastga gnanc controllar las singulas spediziuns da cudeschs empustads a l'ester sur l'internet. Entant ch'ils librarists svizzers fissan sfurzads d'observar la lescha, na vegniss la concurrenza estra betg sancziunada per cuntravenziuns. Ultra da quai na valessan ils pretschs fixs explicitamain betg per cudeschs electronics che pudessan damai vegnir purschids per pretschs pli favuraivels. Da quai profitassan unicamain concerns esters sco Amazon, Apple e Google.

Votai perquai NA – cunter pretschs fixs per cudeschs!

Ulteriuras infurmaziuns chattais Vus en tudestg sin:

www.buchpreisbindung-nein.ch

Ils arguments dal Cussegl federal e dal parlament

Ils pretschs fixs per cudeschs promovan la diversitat culturala da la purschida da cudeschs. Els protegian las librarías. Las experientschas fatgas fin ussa mussan ch'in martgà da cudeschs senza pretschs fixs po chaschunar a lunga vista pretschs pli auts. Tut ils pajais vischins danor il Liechtenstein enconuschan medemamain ina legislaziun davart pretschs fixs per cudeschs. Il parlament sustegna il project, oravant tut per ils sustants motivs:

Il cedesch è in bain cultural che represchenta l'identitat d'in pajais ed ha perquai ina gronda impurtanza per la Svizra. Cudeschs conservan savida, els stimulateschan la fantasia e mantegnan la diversitat linguistica. La multifariadad e la qualitad da quest bain cultural èn periclitadas, perquai che numerusas librarías independentas èn svanidas en il decurs dals ultims onns.

Chasas edituras svizras che produceschan paucs cudeschs en la cumparegliazun internaziunala han mo ina pitschna influenza sin il martgà. Ellas pon mo surviver, sche lur cudeschs vegnan preschentads en il commerzi. In commerzi da cudeschs reduci à paucas grondas gruppas diminuescha fermamain la schanza per cudeschs da chasas edituras svizras d'entrar en il commerzi. Sche las schanzas per chasas edituras svizras sin la fiera daventan mendas, pateschan er las auturas ed ils auturs svizzers. I dovrà chasas edituras multifaras e localas per pudair publitgar lur ovras. Ils pretschs fixs per cudeschs rinforzan questa rait che collia tut la Svizra. Els èn in instrument per promover ina cultura che funcziunescha senza subvenziuns.

Ils pretschs fixs per cudeschs garanteschan las medemas schanzas en il commerzi da cudeschs: Senza pretschs fixs per cudeschs pon supermartgads e librarías grondas, che pon sa prestar reducziuns agressivas, vender ils cudeschs per in pretsch bler pli bass ch'il pretsch recumandà. Las svieutas sin ils bestsellers permettan dentant gist a las librarías pitschnas

Il cedesch sco
bain cultural

Rinforzar las
chasas edituras
ed ils auturs

Medemas
schanzas

e mesaunas da cumpensar las svieutas pli pitschnas da titels che sa vendan main bain. Sch'ils bestsellers vegnan cumprads en ils supermartgads u en las librarias grondas, mancan els en la svieuta da las librarias pitschnas e mesaunas. Quai mussa l'exempel da la Svizra franzosa: La reducziun dal dumber da librarias e da chasas edituras è stada bler pli drastica en cumparegliaziun cun la Svizra tudestga, nua ch'ils contracts da pretschs fixs per cudeschs han protegi ils manaschis pitschens fin l'onn 2007³.

Ina rait spessa da librarias garantescha l'access da la populaziun als cudeschs. Ella promova er ina gronda diversitat da la purschida. Numerusas cumpras en librarias èn cumpras spontanas. Da quellas profitescan en spezial titels main enconuschents. Experientschas fatgas a l'exterior conferman che l'aboliziun dals pretschs fixs per cudeschs chaschuna a vista mesauna ina reducziun da titels novs³. Parallelamain èn creschidas las quotas dal martgà dals supermartgads e da vendiders da cudeschs sur l'internet.

Las experientschas fatgas fin ussa mussan ch'in martgà da cudeschs senza pretschs fixs chaschuna pretschs pli auts: Per exemplu en la Gronda Britannia, nua ch'ils pretschs per cudeschs èn s'augmentads bler pli fitg ch'ils pretschs da consum suenter l'aboliziun dals pretschs fixs per cudeschs³. Entant ch'ils pretschs per bestsellers èn sa reducids, èn creschids ils pretschs per ils auters cudeschs che na vegnan betg pli finanziads cun agid da pretschs fixs per cudeschs. Las medemas experientschas han ins er fatg en Svizra: Dal temp ch'ina convenziun protegiva il martgà en Svizra tudestga era la differenza dals pretschs en cumparegliaziun cun l'exterior bler pli gronda en Svizra franzosa, nua ch'ils pretschs eran gia libers.

Mantegnair ina purschida multifara

Senza pretschs fixs vegnan ils cudeschs pli chars

³ Ils exempels en quest chapitel èn cuntegnids en il rapport da la Cumissiun per economia e taxas dal Cussegli nazional dals 20 d'avrigl 2009 davart l'iniziativa parlamentara nr. 04.430 areguard la regulaziun dals pretschs da cudeschs. Fegl uffizial federal 2009, p. 4135–4147 (versiun tudestga).

Er per las consumentas e per ils consuments ha la lescha avantatgs. Els vegnan protegids da differenzas dals pretschs fitg grondas envers l'exterior. Il survegliader dals pretschs po agir cunter l'abus concernent ils pretschs. Sch'ils pretschs per cudeschs divergeschan memia fitg da quels a l'exterior vischin, po il survegliader dals pretschs proponer al Cussegl federal da fixar per mintga regiun linguistica ina differenza dals pretschs maximala autorisada. Uschia po il Cussegl federal per exemplu sfurzar la branscha da cudeschs da dar vinavant ils avantatgs monetars che resultan dal ferm franc svizzer.

Dar vinavant ils
avantatgs monetars

Per tut queste motivs recumondan il Cussegl federal ed il parlament d'acceptar la Lescha federala davart ils pretschs fixs per cudeschs.



Text da votaziun

Lescha federala davart ils pretschs fixs per cudeschs (LPCud)

dals 18 da mars 2011

L'Assamblea federala da la Confederaziun svizra,

sa basond sin ils artitgels 69 alinea 2 e 103 da la Constituziun federala¹, suenter avair prendi invista dal rapport da la Cumissiun per economia e taxas dal Cussegl naziunal dals 20 d'avrigl 2009² e da la posiziun dal Cussegl federal dals 20 da matg 2009³, *concluda:*

Art. 1 Intent

Questa lescha duai:

- a. promover la diversitat e la qualitat dal cedesch sco bain cultural;
- b. garantir che uschè bleras lecturas e lecturs sco pussaivel hajan access a cedeschs a las meglras cundiziuns pussaivlas.

Art. 2 Champ d'applicaziun

Questa lescha regla ils pretschs da cudeschs novs che n'hant nagins donns, ch'èn redigids en ina lingua naziunala svizra e che vegnan:

- a. edids en Svizra;
- b. importads da professiun en Svizra; u
- c. vendids e cumprads en Svizra;

Art. 3 Noziuns

En questa lescha signifitgeschan las suandantas noziuns il sequent:

- a. *cudesch*: mintga product stampà d'ina editura u d'in editur e mintga product cumbinà, dal qual il product stampà è l'element principal; betg sco cudeschs valan en spezial gasettas, revistas, partituras e products cartografics;
- b. *pretsch da vendita final*: pretsch, per il qual il cedesch vegn offrì al cumprader final en Svizra, inclusiv la taglia sin la plivalur;
- c. *cumprader final*: persuna che cumpra in cedesch senza l'intent da vulair revender il cedesch;

¹ CS 101

² Fegl uffizial federal 2009 4135 (versiun tudestga)

³ Fegl uffizial federal 2009 4169 (versiun tudestga)

d. *librarist*: persuna che venda da professiun cudeschs a cumpraders finals.

Art. 4 Fixaziun dals pretschs

¹ L'editur u l'importader fixescha ils pretschs da vendita finals per ils cudeschs ch'el edescha u importa.

² El sto publitgar il pretsch da vendita final avant l'emprima ediziun dal cedesch u avant la midada da pretsch; a medem temp sto el publitgar la data da cumparizion u la data da la midada da pretsch.

³ Il svilup dals pretschs dals cudeschs vegn observà dal survegliader dals pretschs (art. 4 al. 1 da la Lescha federala dals 20 da decembre 1985⁴ davart la surveganza dals pretschs). El po proponer al Cussegl federal da fixar en in'ordinazion las differenzas da pretsch maximalas admissiblas en cumparegliazion cun l'exterior, e quai resguardond las regiuns linguisticas.

Art. 5 Pretschs fixs

Ils librarists dastgan vender ils cudeschs mo per il pretsch da vendita final fixà tenor l'artitgel 4.

Art. 6 Rabat general

Ils librarists dastgan conceder in rabat da maximalmain 5 pertschient sin il pretsch da vendita final.

Art. 7 Rabats spezialis

¹ Sin il pretsch da vendita final pon vegnir concedids rabats:

- a. per vender cudeschs a bibliotecas publicas che han in budget annual per comprar cudeschs:
 1. da maximalmain 500 000 francs: fin 10 pertschient,
 2. da passa 500 000 e da maximalmain 1 000 000 francs: fin 15 pertschient,
 3. da passa 1 000 000 francs: in rabat liber;
- b. per vender plirs exemplars dal medem cedesch:
 1. 11 fin 50 exemplars: fin 10 pertschient,
 2. 51 fin 100 exemplars: fin 15 pertschient,
 3. dapli che 100 exemplars: fin 20 pertschient;
- c. per vender en bloc ina seria d'ovras che tutgan ensemen e per subscriber in'ovra fin che quella cumpara cumplettamain: in rabat liber;
- d. per cudeschs ch'in club da cudeschs venda a ses commembers en atgna ediziun e pli tard che l'ediziun originala: in rabat liber.

⁴ CS 942.20



² Quests rabats pon vegnir cumulads cun il rabat tenor l'artitgel 6, dentant betg in cun l'auter.

Art. 8 Durada dals pretschs fixs

Sch'in cedesch è vegni vendì durant almain 18 mais per in pretsch fix en Svizra u a l'exterior, po l'editur u l'importader declarar che l'obligaziun dal pretsch fix saja terminada. El sto l'emprim publitgar questa declaraziun.

Art. 9 Vendita a commerziants d'autras branschas

Ils editurs, ils importaders sco er ils grossists na dastgan betg furnir per pretschs pli bass u uschiglio a cundiziuns pli favuraivlas cedeschs a librarists cun in sortiment che na consista betg principalmain da cedeschs.

Art. 10 Plants

¹ Tgi che vegn smanatschà u violà en ses interess economics tras cuntravenziuns cunter ils artitgels 4 fin 9, po pretender da la dretgira:

- a. da scumandar ina violaziun smanatschanta;
- b. d'eliminar ina violaziun existenta;
- c. da constatar l'illegalitat d'ina violaziun, sche quella disturba vinavant.

² El po pretender che la sentenzia vegnia communityada a terzas personas u vegnia publitgada.

³ A norma dal Dretg d'obligaziuns⁵ po el purtar plant sin indemnisiuzion dal donn e sin ina bunificaziun sco er sin consegna d'in gudogn tenor las disposiziuns davart la gestiun senza mandat.

Art. 11 Plants d'organisaziuns

Il dretg da purtar plants tenor l'artitgel 10 alineas 1 e 2 han medemamain:

- a. las federaziuns professiunalas ed economicas d'impurtanza naziunala u regiunala ch'en autorisadas tenor lur statuts da defender ils interess economics:
 1. dals editurs,
 2. dals importaders,
 3. dals grossists,
 4. dals librarists,
 5. dals auturs;
- b. las organisaziuns d'impurtanza naziunala u regiunala che sa deditgeschan tenor lur statuts a la protecziun dals consuments.

⁵ CS 220

Art. 12 Represchentant da la branscha

¹ La branscha nominescha in represchentant che defenda ils interess dals commembbers da la branscha, e quai independentamain da la commembranza en in'organisaziun da la branscha.

² Il represchentant da la branscha è autorisà da purtar plants tenor l'artitgel 10 alineas 1 e 2.

Art. 13 Dretgiras da cumpromiss

Las dretgiras da cumpromiss permanentas, ch'èn spezialisadas sin l'applicaziun da questa lescha, ston:

- a. acceptar tut las partidas, independentamain da la commembranza en in'organisaziun da la branscha, sche las partidas las appelleschan sin basa d'ina cunvegna da cumpromiss valaivla;
- b. porscher las medemas condiziuns a las partidas, independentamain da la commembranza en in'organisaziun da la branscha;
- c. esser independentas da las organisaziuns da la branscha.

Art. 14 Referendum ed entrada en vigur

¹ Questa lescha è suttamessa al referendum facultativ.

² Il Cussegl federal fixescha l'entrada en vigur.

PP
Spediziun postala

Trametter enavos a la controlla
d'abitants da la vischnanca

**Recumandaziun
a las votantas ed als votants**

Il Cussegli federal ed il parlament recumondan a las votantas ed als votants da votar ils 11 da mars 2012 sco suonda:

- Na a l'iniziativa «Per metter ina fin a la construcziun excessiva d'abitaziuns secundaras!»
- Il parlament ha desistì da dar ina recumandaziun per la «Iniziativa per il respargn immobigliar»
- Na a l'iniziativa «6 emnas vacanzas per tuts»
- Gea al conclus federal davart la reglamentaziun dals gieus per daners a favur da l'utilitad publica
- Gea a la Lescha federala davart ils pretschs fixs per cudeschs

Fin da redacziun:
30 da novembrer 2011

Ulteriuras infurmaziuns sin:
www.admin.ch
www.parlament.ch
www.ch.ch

Edì da la Chanzlia federala